



Ilidža 2020

INFORMATIVNI BILTEN
OPĆINE ILIDŽA

Ilidža • Juni-Juli 2020

• Broj 191



RAMIZ SELAK
ovogodišnji pobjednik



Održana 36. redovna sjednica Općinskog vijeća Ilidža



Općinsko vijeće Ilidža na 36. sjednici održanoj 10. juna 2020. godine u Multifunkcionalnoj sali usvojilo je izmjene i dopune Budžeta Općine Ilidža za 2020. godine, sa 29.400.000,00 KM na 49.000.000,00 KM. Najviše sredstava usmjereno je na izmjene za kapitalne projekte, pa je došlo do povećanja sa 11.000.000 KM na oko 24.000.000 KM. Značajne stavke su povećane na izdvajanjima za stipendije sa 300.000 na 640.000 KM, za jednokratne pomoći sa 630.000 na 700.000 KM, za sport sa 494.000 na 543.000 KM, udruženja građana sa 600.000 na 850.000 KM, finansiranje javnih ustanova sa 870.000 na 1.430.000 KM, za podsticaj poljoprivredi sa 250.000 na 290.000 KM. Rebalansom je predviđeno i ublažavanje posljedica izazvanih virusom COVID-19. Jedna od tih mjera je omogućavanje samozapošljavanja, putem finansiranja biznis planova. Obzirom da je do sada planirana stavka za biznis planove bila 70.000 KM, povećana je na 90.000 KM. Druga mjera vezana za pomoć Općine Ilidža jeste finansiranje zakupnine poslovnih prostora i korištenje javne površine u vlasništvu Općine, a bit će plaćena zakupnina za zakupce kojima je bio zabranjen rad i to za period od 18.03. do 31.05.2020. godine. Obaveze se odnose na zakupninu s obračunatim PDV-om. Zakupci ne moraju podnositi zahtjeve, jer će Općina Ilidža na bazi svoje evidencije izvršiti uplate zakupnine u korist općine i o tome obavijestiti zakupce radi knjiženja. Za ove namjene izdvojeno je 80.000 KM. Općinsko vijeće dalo je saglasnost općinskom načelniku da potpiše ugovor sa Kantonom Sarajevo o finansiranju dijela plaće obrtnicima kojima je bio zabranjen rad, a za te namjene Općina je planirala 300.000 KM. O proceduri kako ispuniti uslove i dobiti to pravo, javnost će na vrijeme biti obaviještena.

Općinsko vijeće usvojilo je izvještaj centralne popisne komisije za koordinaciju rada popisnih komisija za 2019. godinu. Prema izvještaju komisije, Općina Ilidža u svom vlasništvu ima 40 stanova, 28 poslovnih prostora, 23 uknjižena objekta, te jedan neuknjiženi. Općina Ilidža posjeduje 16 alarmnih sistema u objektima MZ, kao i alarmni sis-

tem u ulici Mala aleja 40. Komisija za popis osnovnih sredstava sitnog inventara konstatovala je da ukupna vrijednost osnovnih sredstava iznosi 21.622.521,89 KM. Predloženo je i savnjavanje osnovnih sredstava dopunom nedostajućih inventurnih brojeva, a zbog dotrajalosti i neupotrebljivosti, otpis ukupno 100 osnovnih sredstava, sadašnje vrijednosti 1.684,26 KM.

Usvojen je godišnji finansijski izvještaj Općine Ilidža za period od 01.01.-31.12.2019. godine, prema iskazanom računu prihoda i rashoda za period 01.01.-31.12.2019. godine. Prema izvještaju prihodi iznose 36.469.166,40 KM, a rashodi 29.501.185,89 KM. Razlika između prihoda, primitaka i rashoda i izdataka iznosi 6.967.980,51 KM, i prenosi se u Budžet za 2020. godinu, dok će raspored viška prihoda, primitaka i rashoda i izdataka za 2019. godinu biti izvršen posebnom odlukom. Za 2019. godinu Općina Ilidža je primijenila 100 - postotni metod otpisa sitnog inventara. Politika amortizacije osnovnih sredstava zasniva se na primjeni linearnog metoda amortizacije - po godišnjim stopama propisanih nomenklaturom sredstava za amortizaciju, kao i direktni otpis osnovnih sredstava vrijednosti manje od 1.000,00 KM. Za dospjela, a ne naplaćena potraživanja provedeno je knjiženje na sumnjiva i sporna potraživanja i pokrenuti postupci prisilne naplate putem Pravobranilaštva Općine Ilidža. Za nabavke roba i usluga u toku 2019. godine poštivana je procedura javnih nabavki propisanih zakonom. Za sve usluge po Ugovorima o djelu i drugo plaćene su obaveze poreza i doprinosa i naknada propisanih Zakonom. Na osnovu Ugovora vršio se i obračun izdataka za stručno osposobljavanje bez zasnivanja radnog odnosa sa pripadajućim porezima i doprinosima i naknadama u skladu sa Zakonom. U 2019. godini Općina Ilidža nije imala kreditnih zaduženja.

Pred vijećnicima je bio i Izvještaj o izvršenju Budžeta Općine Ilidža za period 01.01. - 31.12. 2019. godine koji je prihvaćen. Prema Izvještaju o izvršenju Budžeta za 2019. godinu ukupno ostvareni prihodi i primici su 36.469.166,40 KM, a



ukupno izvršen raspored prihoda i primitaka (ukupno izvršeni rashodi i izdaci) je 29.501.185,89 KM. Razlika između ostvarenih prihoda i primitaka i rashoda i izdataka je 6.967.980,51 KM i prenosi se u Budžet za 2020.g. čiji raspored će biti izvršen posebnom Odlukom. Na 36. redovnoj sjednici održanoj 10. juna 2020. godine Općinsko vijeće donijelo je Odluku o utvrđivanju prosječne konačne građevinske cijene po kvadratnom metru korisne površine u stambenoj izgradnji na području općine Ilidža u 2019. godini. Tom odlukom utvrđuje se prosječna konačna građevinska cijena kvadratnog metra korisne stambene površine na području općine Ilidža, u 2019. godini, u iznosu od 1.100,00 KM. Utvrđena prosječna konačna građevinska cijena iz ove Odluke služi kao osnovica za izračunavanje visine naknade za pogodnosti građevinskog zemljišta (rente) za 2020. godinu. Općinsko vijeće na prijedlog Općinskog načelnika za svaku godinu po zonama građevinskog zemljišta, donosi odluku prema propisanom procentu od prosječne konačne građevinske cijene iz prethodne godine na području Općine Ilidža. Tako utvrđena početna visina naknade iz osnove pogodnosti gradskog građevinskog zemljišta po kvadratnom metru korisne površine građevine za jednu godinu, uz zakonom propisanu valorizaciju, primjenju se do utvrđivanja njene početne visine za narednu godinu. Vijeće je donijelo i Odluku o izmjenama i dopunama odluke o utvrđivanju javnog interesa za izgradnju saobraćajnice sa pješačkom stazom u ulici Hendekusa- Ilidža. Predmetna odluka kojom je utvrđen javni interes je materijalno pravni preduslov za pokretanje i provođenje postupka potpune eksproprijacije.

Mirzeta Mahmutović na 36. sjednici Općinskog vijeća Ilidža imenovana je za zamjenika Općinskog pravobranioca. Nakon odluke da Mirzeta Mahmutović ispunjava uslove i može preuzeti posao zamjenika pravobranioca položila je svečanu zakletvu.

Općinsko vijeće Ilidža donijelo je rješenje o imenovanju članova Općinske izborne komisije Ilidža. Za članove Općinske izborne komisije Ilidža imenovani su: Ibran Avdić, Aida Godinjak, Vanja Milidrag, te Darko Rimac.

Na posljednjoj sjednici Općinskog vijeća usvojen je Prijedlog programa rada JU, Kulturno sportski i rekreacioni centar Ilidža, za period od 01. 01. do 31. 12. 2020. godine. U Nadzornom odboru ove ustanove su: Čuhara Haris, Alić Suljo, Baručija Elvir. Upravni odbor čine: Senaid

Tursunović, Zejnil Leka, Jasminka Ademović, Almedin Fetahović, Amir Grošo. Kulturno sportski i rekreacioni centar Ilidža je javna ustanova od posebnog društvenog interesa, a u okviru njene djelatnosti i programske aktivnosti zadovoljavaju se potrebe i interesi građana i udruženja, sa područja općine Ilidža te šire u oblasti kulture, sporta i rekreacije. U tom pravcu, učinjeni su značajni naponi na poboljšavanju uslova za održavanja kulturnih i sportskih manifestacija lokalnog, državnog i međunarodnog značaja.

Općinsko vijeće usvojilo je Prijedlog plana stipendiranja učenika i studenata slabijeg imovnog stanja u visokoškolskom obrazovanju za školsku 2020./2021. godinu.

Stipendirat će se 80 učenika, a za te namjene izdvojeno je 60.000,00. Za visoko obrazovanje planirana sredstva za stipendiranje su 100.000,00 KM, a finansirat će stipendije za 100 studenata.

Izveštaj o radu sa ocjenom stanja i prijedlogom mjera drugostepene stručne komisije Općinskog vijeća Ilidža za period 01.01. - 31.12.2019. godine, bila je jedna od tačaka dnevnog reda. U izvještajnom periodu od 01.01. - 31.12.2019. godine, Drugostepena stručna komisija je održala 14 sjednica, gdje je zaprimila i uzela u rad 34 predmeta (19 žalbi i 15 tužbi).

Od ukupnog broja zaprimljenih predmeta tokom godine, Komisija je sve predmete riješila, a od toga 17 uloženi žalbi su odbijene kao neosnovane i potvrđena prvostepena rješenja dok su dvije žalbe usvojene, gdje je Komisija poništila osporena rješenja i vratila prvostepenom organu na ponovno postupanje.

Vijećnici su usvojili i godišnji izvještaj JP "Ilidža" d.o.o. za poslovnu 2019. godinu, kao i Izvještaj o radu Savjeta MZ. Vijećnici su primili k znanju i sljedeće informacije: o aktivnostima Pete policijske uprave Ilidža za vremenski period januar- decembar 2019. godine, o provođenju Zakona o pravima branilaca i članova njihovih porodica i Zakona o posebnim pravima dobitnika ratnih priznanja i odlikovanja i članova njihovih porodica, o provođenju Zakona o pravima demobilisanih branilaca i članova njihovih porodica za 2019. godinu, o zimskom održavanju saobraćajnica na području općine Ilidža za 2019/2020. godinu, kao i o aktivnostima Štaba civilne zaštite općine Ilidža tokom pandemije uzrokovane koronavirusom za period 25.02.-15.05. 2020. godine, te o radu Općinskog vijeća Ilidža i stalnih radnih tijela Općinskog vijeća Ilidža za 2019. godinu.





Nastavak izgradnje saobraćajnice sa tramvajskim pojasom

Sporazum o međusobnim pravima i obavezama pri realizaciji radova na izmještanju vodovodnih instalacija u dijelovima ulica Dr. Halid bega Hrasnice i Put Famosa, vezano za izgradnju kružnog toka u Hrasnici, na saobraćajnici Ilidža -Hrasnica sa tramvajskim pojasom, potpisan je 20. jula 2020. u Općini Ilidža.

Sporazum su potpisali načelnik Općine Ilidža prof.dr. Senaid Memić i direktor KJKP Vodovod i kanalizacija d.o.o Enver Hadžiahmetović. Izmještanje vodovodnih cijevi promjera 200 i 400 milimetara na ovom lokalitetu u narednom periodu riješit će se sa KJKP Vodovod i kanalizacija. Vrijednost izmještanja vodovodnih instalacija definisano sporazumom je 35.000,00KM.

Općina Ilidža je u ovoj budžetskoj godini planirala nastavak izgradnje saobraćajnice sa tramvajskim pojasom Ilidža-Hrasnica i to izgradnju kružnog toka u Hrasnici i nastavak prema Famosu sa dva kolovoza u dužini 130 metara, te dalje preusmjeravanje u jedan kolovoz. Za izvođača radova izabrana je firma Mevludin Commerc d. o.o. Iznos ugovorenih radova je 1.518.778,39KM.

Početak izvođenja radova uslovljen je izmještanjem instalacija van tramvajskog i saobraćajnog pojasa. Izmještanje gasovoda (čeličnih i plastičnih cijevi sa katodnom zaštitom) urađen je sa Sarajevogasom d.o.o.

U toku izvođenja radova dogovoreno je i izmještanje ostalih instalacija od Elektrodistribucije i BH Telekomu.



Potpisan Sporazum o izgradnji treće faze saobraćajnice u Blažuju

Sporazum o sufinansiranju projekta "Izgradnja treće faze servisne saobraćajnice od raskršća u Blažuju kroz kompleks "Bosanka Blažuj" i kompleks "Vlakovo 2" do spoja sa ulicom Vlakovo" potpisan je 24. jula 2020 u zgradi Kantona Sarajevo. Sporazum su potpisali načelnik Općine Ilidža prof.dr. Senaid Memić, direktor Zavoda za izgradnju Kantona Sarajevo Mirza Hulusić i ministar za privredu Kantona Sarajevo Draško Jeličić. Ukupan iznos kojim Ministarstvo privrede Kantona Sarajevo sufinansira projekat izgradnje treće faze servisne saobraćajnice je 200.000 KM. Stručni nadzor nad realizacijom projekta vršit će Zavod za izgradnju Kantona Sarajevo.





Sanacija mosta u Butmiru

Općina Ilidža je u ovoj 2020. godini planirala izvođenje radova na rekonstrukciji i sanaciji mosta na saobraćajnici Butmirska cesta do broja 178 u Butmiru. Projektno tehničku dokumentaciju je uradila projektna kuća OSGT d.o.o., izvođač radova je Pont d.o.o., a nadzor nad izvođenjem radova povjeren je firmi HS Inženjering d.o.o. Vrijednost investicije je 285.000,00 KM. Most je izgrađen 1911. godine. Sanacija je neophodna na konstruktivnim elementima mosta a demontiraju se dotrajale čelična dodatna konstrukcija mosta i izvođe se radovi na betnskim pješačkim stazama. Prilikom izvođenja radova izmjestit će se vodovodna cijev koja će se fiksirati na betonski dio pješačke staze. Ujedno će se po završetku ovih radova izvršiti i učeđenje korita ispod mosta. Rok izvođenju radova je 90 dana i za to vrijeme doći će do preusmjerenja saobraćaja.

Napreduju radovi na izgradnji rezervoara Crkvine

Radovi na izgradnji vodovodnog rezervoara „Crkvine“ teku planiranom dinamikom. Izgradnjom ovog rezervoara koji je sastavni dio vodovodnog sistema riješit će se vodosnabdjevanje padinskih dijelova MZ Osijek i Blažuj, na području općine Ilidža.

Ukupna zapremina rezervoara je 1400 metara kubnih vode za piće. Izgradnja je planirana u dvije faze. Prvom fazom planirana je izgradnja zatvaračke komore i jedne vodne zapremine 700 kubnih metara vode što će zadovoljavati potrebe stanovništva vodom za duži vremenski period. Ovaj projekat u iznosu 901.000,00 KM finansira Općina Ilidža sa Ministarstvom za komunalnu privredu Kantona Sarajevo. Rok za završetak radova je decembar 2020. godine.



Za asfaltiranje 14 ulica izdvojeno 1.445.088,48 KM

Na području općine Ilidža asfaltirane su četiri, a u toku je rekonstrukcija još deset ulica. Za ove radove Općina Ilidža iz budžeta je izdvojila 1.445.088,48 KM. U toku je rekonstrukcija ulice Ramiza Jašara u dužini od 130 i širini od šest metara kolovoz plus, pet metara parking. Investitor je Općina Ilidža, a izvođač radova je firma Braća Mujić d.o.o. Vrijednost radova je 62.000,00 KM. Novi asfalt se radi i u ulici Plandište i to dužine 135 i širine šest metara. Radove u vrijednosti 82.000,00 KM finansira Općina Ilidža, a povjereni su firmi Braća Mujić d.o.o. U toku je asfaltiranje ulice Gaj u dužini 130 i širine četiri metra. Investitor je Općina Ilidža, a izvođač radova firma Braća Mujić d.o.o. Vrijednost radova iznosi 32.500,00 KM. Novi asfalt dobit će i stanovnici ulice Gornja mahala i to u dužini od 300 i širini tri metra. Radove izvođe radnici firme Sarajevoputevi d.d., a finansira ih Općina Ilidža u vrijednosti od 48.000,00 KM. Novi asfalt se radi i u ulici Dr. Halid bega Hrasnice u dužini 315 metara i širini pet metara. Vrijednost radova je 187.200,00 KM. Izvođač radova je firma GP ing d.o.o. Investitor Općina Ilidža. Završeni su radovi na proširenju ulice Zaima Topčića. Općina Ilidža radove je povjerila firmi Sarajevoputevi d.d., a vrijednost radova je 10.000,00 KM. Općina Ilidža je finansirala asfaltiranje ulica u omjeru 70 posto, a građani 30 posto, i to u tri ulice u kojima su okončani radovi i pet u kojima su radovi u toku. Okončano je asfaltiranje ulice Mratnjevače do br. 29 u dužini od 426 i širini od tri do tri i po metra. Investitori su Općina Ilidža i građani. Izvođač radova firma DEMUS d.o.o., a vrijednost radova je 44.729,91 KM. Asfaltirana je i ulica Osik 626 u dužini 155 metara i širine tri i po metra. Investitori Općina Ilidža 70 posto i građani 30 posto. Izvođač radova firma DEMUS d.o.o. Vrijednost radova 18.819,20 KM. Radovi su okončani i u ulici Polje u dužini 203 i četiri metra širine. Investitori su Općina Ilidža 70 posto i građani 30 posto. Izvođač radova je firma DEMUS d.o.o. Vrijednost radova je 28.300,00 KM. Novi asfalt se radi i u ulici Blatuša od br. 55 do br. 59 u dužini od 37 metara i širine tri metra. Investitori su Općina Ilidža i građani. Radovi su povjereni firmi Braća Mujić d.o.o. Vrijednost radova je 3.900,00 KM. U toku je rekonstrukcija u ulici Blatuša od br. 39 do br. 29 u dužini 89 metara i širini tri metra. Investitor Općina Ilidža 70 posto i 30 posto građani. Općina Ilidža je za ove radove izdvojila 9.600,00 KM, a povjerila firmi Braća Mujić d.o.o. Asfaltira se i krak ulice Vitomira Jukovića- Luxe od br. 11 do br. 15 u dužini od 60 i širine tri i po metra. Investitor je Općina Ilidža 70 posto i građani 30 posto. Izvođač radova je firma Braća Mujić d.o.o. Vrijednost radova je 7.200,00 KM. U toku je rekonstrukcija ulice Kakrinjski put od br. 200 do br. 212 u dužini od 97 i širini tri metra. Vrijednost radova iznosi 10.200,00 KM. Investitor Općina Ilidža i građani. Radove izvođe radnice firme DEMUS d.o.o. Novi asfalt dobit će i stanovnici u ulici Vlakovo (od nove klaonice „Mujanić“ do br. 252) u dužini 877 metara i širine 3,5 metra. Investitor: Općina Ilidža je investitor 50 posto i građani 50 posto. Izvođač radova je firma DEMUS d.o.o., a vrijednost radova je 118.600,00 KM.



Općina Ilidža podijelila 150.000 KM za projekte iz obrazovanja, kulture i sporta

Uručeni ugovori aplikantima

Općina Ilidža i ove godine je dodijelila novčana sredstva na ime (su) finansiranja projekata po Javnom pozivu iz oblasti sporta, kulture i obrazovanja za 2020. godinu. Po javnom pozivu odobrena su sredstva u iznosu od 150.000,00 KM i to za sport 50.000,00 KM, kulturu 50.000,00 KM, te za obrazovanje 50.000,00 KM.

U Općini Ilidža 23. juna 2020. godine načelnik prof. dr. Senaid Memić je uručio ugovore aplikantima koji su dobili sredstva po ovom javnom pozivu.

Na raspisani javni poziv aplicirala su 84 aplikanta sa 120 projektnih prijedloga, a ove godine realizirat će se 95 projekata. Općina Ilidža sufinansirat će iz oblasti sporta 32 projekta, iz kulture 27, te iz oblasti obrazovanja 36 projekata.

Načelnik Općine Ilidža prof. dr. Senaid Memić čestitao je aplikantima koji su dobili sredstva i izrazio nadu da će projekti koji se realizuju biti u interesu građana.

Admir Sakoč predsjednik Košarkaškog kluba „Ilidža“ zahvalio je Općini Ilidža koja je i ove godine pomogla njegov



klub, kazavši da će projekt „Besplatna škola košarke za djecu lošijeg socijalnog statusa“ biti u potpunosti realizovan i sigurno izazvati osmijeh na licima mališana.

Dobra saradnja općina Novi Grad i Ilidže

Načelnik Općine Novi Grad Semir Efendić posjetio je 20. jula 2020. godine Općinu Ilidža. Dobra praksa međusobne saradnje, te sagledavanje problema sa kojima se susreću, bila je tema razgovora sa načelnikom prof. dr. Senaidom Memićem.

Razgovarano je i o realizaciji izgradnje zabavnog parka na prostoru nekadašnje kasarne Nedžarići.

Načelnici su najavili da će tokom ove godine započeti rad na projektu uređenja dijela bivše kasarne Nedžarići,

Jedna od tema razgovora bila je ublažavanje negativnih posljedica uzrokovanih coronavirusom.

Sa načelnikom Efendićem u delegaciji je bio i zagrebački muftija Aziz Hasanović, koji je poručio da građani trebaju da učine sve da ne potiču zarazu, a ujedno i da svi pokažemo veliku zahvalnost svima koji nam pomažu svojim znanjem da se sačuvamo raznih virusa i bolesti.



Zahvalnost KPZ Općini Ilidža

Direktor Kazneno-popravnog zavoda poluotvorenog tipa Sarajevo Faruk Zubčević sa saradnicom Ozanom Džano obavili su radnu posjetu 2. jula 2020. Općini Ilidža, gdje ih je primio načelnik Senaid Memić sa saradnicima. Tom prilikom predstavnici KPZ-a Sarajevo su uručili zahvalnice načelniku Senaidu Memiću, te njegovim saradnicima Jasminu Voloderu i Velidi Milišić za dosadašnju vrlo uspješnu i korektnu saradnju Općine Ilidža i KPZ-a Sarajevo, a koja se kontinuirano nastavlja implementacijom proširenja kapaciteta i gradnje pritvorske jedinice KPZ-a Sarajevo - objekat Igman.





PJEVALO SE U INAT CORONI-FESTIVAL NARODNE MUZIKE

Ramiz Selak ovogodišnji pobjednik Ilidžanskog festivala



Ovogodišnji Festival narodne muzike "Ilidža" zbog epidemiološke situacije održan je bez prisustva publike, ali pjesma je nadjačala koronu i festival nije otkazan. Održan je 23., 24. i 25. jula na Ljetnoj pozornici. Hayat televizija zajedno sa Općinom Ilidža, u okviru svojih mogućnosti dali su maksimum u organizaciji ovog festivala. Potvrđeno je da je ovo najcijenjeniji i najpoznatiji festival narodne muzike u bivšoj Jugoslaviji. Ramiz Selak je po ocjeni žirija otpjevao najbolju pjesmu na ovogodišnjem Ilidžanskom festivalu. On se predstavio sa kompozicijom "San o Mostaru" koju potpisuju Armin Šaković, Amil Lojo i Emin Šaković. Pobjednička pjesma osvojila je i nagrade za najbolji aranžman i tekst. Simpatije publike osvojio je Almin Džanković koji je pjevao "Tebi iz inata" Fahrudina Pecikoze. Nagradu za najbolju muziku dobio

je Mirko Šenkovski Geronimo i to za pjesmu "Sa čaršije do Skadarlije" koju je interpretirao Ibro Selmanović. Fatmir Sulejmani sa kompozicijom "Noću sanjam čaršiju" dobio je nagradu za najbolju interpretaciju. Žiri je uručio i specijalnu nagradu Nazifu Gljivi za dugogodišnji doprinos estradnoj sceni. - Ostvario se moj san, rekao je vidno uzbuđen pobjednik Selak. Na revijalnoj noći publika pored malih ekrana je mogla uživati uz pjesme: Slađane Mandić, Lepe Lukić, Branke Sovrlić, Nedžada Salkovića, Armina Šakovića, Dragana Kojića Kebe, Nihada Alibegovića, Enesa Begovića, Hanke Paldum... Enes Begović u revijalnoj noći festivala "Ilidža 2020." dobio je jednu od najdragocijenijih nagrada. Priznao je da je pozitivno iznenađen kada je čuo da je baš njemu pripala nagrada za očuvanje tradicije narodne pjesme.





-Iznenaden sam i velika mi je čast i zadovoljstvo što sam dobitnik te nagrade. I ovom nagradom obećavam svima koji vjeruju u ono što godinama radim, da ću nastaviti ovim putem, nastaviti njegovati tradiciju naroda BiH, da i dalje živi i traje naša bh. kultura na muzičkom polju - kazao je Begović. Prvi put je nastupao na "Ilidži" 1984. godine. Tada je pjevao "Otvorite moje srce".

Pjesma je uvijek spajala jednu i drugu stranu, note kroz koje su protkane poruke ljubavi nikada nisu razdvajale ljude. I u najtežim vremenima pjesme sa festivala "Ilidža" poslale su lijepe poruke spojivši ljude sa svih strana svijeta. Iako nije



bilo lijepo vrijeme, svojstveno za juli to nije umanjilo uživanje onih koji su ipak bili na Ljetnoj pozornici. Načelnik Općine Ilidža prof. dr. Senaid Memić rekao je da kiša nikad nije Bosnu osiromašila, te da nema nevolje koja nas može natjerati da ne budemo dobri, da ne volimo sevdah i dobru pjesmu.

- Ovo je samo dokaz da i Festival može biti online. Mi se trudimo da ljudi od nas dobiju snagu, i budu još bolji. Pjevat ćemo večeras, sutra i prekosutra. Pjevat ćemo uvijek - poručio je načelnik Ilidže prof. dr. Senaid Memić.





Ispraćena još jedna grupa volontera

Povodom uspješno obavljenog volonterskog rada u organu uprave Općine Ilidža u trajanju od 12 mjeseci u Općini Ilidža 30. juna 2020. organiziran je prijem za volontere. Mladi visokoobrazovani ljudi i to njih 32 sa iskustvom stečenim tokom proteklih mjeseci u Općini ostvarili su pravo na polaganja stručnog ispita, nakon čega će biti konkurentni na tržištu rada.

Volonteri su veoma uspješno obavili rad u Općini, te pokazali izuzetnu spremnost na usvajanje novih znanja i vještina. Prema riječima volontera iskustvo stečeno u Općini Ilidža im je od velike koristi i nadaju se da će im pomoći pri pronalasku posla, a zahvalili su se ujedno i na šansi koja im je pružena.

“Ovo je bilo prvo moje radno iskustvo u struci. Završila sam Fakultet političkih nauka, Odsjek žurnalistike. Bila sam godinu dana u Službi za obrazovanje, kulturu, sport i informisanje, odnosno Odsjeku za informisanje. Naučila sam mnogo, pisati saopćenja, informacije, reakcije, demante, kako se organizira pres-konferencija i još mnogo stvari. Upoznala sam mnogo ljudi, što je vrlo korisno.

Bilo je mnogo organizacije na terenu, vrlo dinamično po nekad, i veliko hvala načelniku, hvala ljudima u službi “rekla nam je Zerina Bahtanović-Imamović.



Rožajima poslato 4.700 maski

Neki događaji prije nego se pojavio coronavirus sada nam djeluju kao davna prošlost. Kao da smo sada u nekom novom univerzumu u kojem je sve na prvi pogled isto kao ranije, a sve je drugačije. Stručnjaci kažu da će i doba korone proći i da “normalnost” uprkos brojnim ožiljcima mora doći. Iz ovog doba ćemo sigurno izaći sa drugačijim razumijevanjem zajednice i solidarnosti. Prateći situaciju u Sandžaku i suosjećajući se sa narodom tih krajeva, Općina Ilidža željela je pomoći na bilo koji način. Kako su izrazili potrebu za maskama, Općina je obezbijedila 4.700 maski. Načelnik Općine prof. dr. Senaid Memić uručio je 15. jula 2020. zaštitne maske, Aliji Fejziću, koordinatoru za saradnju sa Opštinom Rožaje. Prema riječima načelnika Memića virus će nas natjerati da ponovo promislimo zašto je život bez solidarnosti veoma rizična opcija i kako u ovim vremenima se poznaju prijatelji.

“Mi nismo zaboravili ljude u Sandžaku i nastojimo im pomoći da što lakše prebrode tešku situaciju u kojoj su se našli. I u narednom periodu zavisí od potreba odazvat ćemo se da pomognemo Novom Pazaru i Tutinu. Ovom akcijom pokazana je solidarnost prema građanima Sandžaka, kao što su oni pokazali solidarnost sa građanima BiH u najtežim trenucima” rekao je načelnik Memić. Fejzić je zahvalio Općini Ilidža na gestu, kazavši kako trenutno nema vakcina protiv koronavirusa, te da najjače preporučeno oružje su osnovne preventivne mjere poput pranja ruku i dezinfekcije površina i nošenje maski, koje nedostaju u Rožajima.



Karmelićanske proslavile Gospu Karmelsku

Zajednica sestara karmelićanki u naselju Stup svečano je 16. jula 2020. godine proslavila naslovnika samostanske crkve - Gospu Karmelsku. Euharistijsko slavlje je predvodio vrhbosanski nadbiskup Vinko kard. Puljić u koncelecijaciji s 10 svećenika. Riječi pozdrava i dobrodošlice u ime sestara uputio je stupski župnik i direktor Medijskog centra Vrhbosanske nadbiskupije velečasni Miroslav Čavar. Osim čestitke pozvao je okupljene vjernike na molitvu za sestre. U prigodnoj propovijedi vrhbosanski nadbiskup je pojasnio značenje pojma „karmel“ kazavši kako to u prijevodu znači „plodna vrtna zemlja“, te je podsjetio kako se blagdan Gospe Karmelske u Katoličkoj Crkvi slavi od 1706. godine. Inače, samostanska zajednica karmelićanki trenutno broji šest sestara. Poslije euharistijskog slavlja, na poziv velečasnog Čavara, pridružio se i načelnik Općine Ilidža prof. dr. Senaid Memić. On je istakao da sestre karmelićanke uvijek mogu računati na podršku Općine Ilidža, čiju zajednicu dugi niz godina općina i podržava.





Načelnik Memić osudio vandalski napad na crkvu u Blažuju

Načelnik Općine Ilidža prof.dr. Senaid Memić izražava zabrinutost i najoštrije osuđuje napad vandala na hram Svetog Save u naslju Blažuj gdje je izvršena provala, kao i na grobljansku salu starog pravoslavnog groblja na Vrelu Bosne, a koja pripada ovoj pravoslavnoj crkvi. Prema njegovim riječima vjerski objekti se smatraju simbolima vjerske zajednice i svaki napad na vjerski objekat može se doživjeti kao napad na cijelu zajednicu i naše komšije. Tim povodom, 27. jula 2020. zajedno sa predsjedavajućim Općinskog vijeća Ilidža Muhamedom Omerovićem i vijećnikom Amelom Pintolom obišao je ovaj sakralni objekat.


U razgovoru sa jerejom Darkom Danilovićem, parohom Blažujskim i protijerom Miljanom Rađenovićem, načelnik Memić je izrazio žaljenje zbog nastale situacije, te obećao pomoć Općine pri kupovini video nadzora, kako bi se smanjila krivična djela.



Tokom posjete načelnika i predsjedavajućeg Općinskog vijeća bili su i pripadnici MUP-a Kantona Sarajevo koji rade na rasvjetljavanju ovog krivičnog djela, identifikaciji i pronalasku počinilaca.

Javni poziv za finansiranje dijela minimalne neto plaće za april

Na osnovu Sporazuma o provođenju kratkoročnih i srednjoročnih mjera od značaja za ublažavanje negativnih posljedica na privredu u Kantonu Sarajevo izazvanih koronavirusom (COVID-19) Općina Ilidža raspisala je 3. jula javni poziv za dodjelu sredstava za finansiranje dijela minimalne mjesečne neto plaće (u FBiH) za april 2020. godine. Pozvani su poslovni subjekti (fizička lica koja samostalno obavljaju registrovanu poslovnu djelatnost) sa sjedištem na području općine Ilidža koji ispunjavaju uslove propisane Uredbom o postupku finansiranja dijela minimalne mjesečne neto plaće za mjesec april i maj 2020. godine da podnesu prijave za ostvarivanje prava za finansiranje dijela minimalne mjesečne neto plaće (u FBiH) za april 2020. godine.



Upozorenja iz Kriznog štaba Ministarstva zdravstva FBiH

Iz Kriznog štaba Federalnog ministarstva zdravstva poručili su građanima da je rizik od zaraze koronavirusom veći na mjestima gdje je prisutno nekoliko faktora. Izbjegavajte 3M, poručili su iz Kriznog štaba. Mjesta na kojima se okuplja veći broj ljudi. Mjesta na kojima su ljudi u bliskom kontaktu, posebno mjesta na kojima ljudi razgovaraju na maloj međusobnoj udaljenosti. Mjesta sa ograničenim ili zatvorenim prostorom sa lošim provjetranjem. Podsjećamo vas i na naredbu Kriznog štaba Ministarstva zdravstva Federacije BiH kojom je obavezno nošenje zaštitnih maski u zatvorenom javnom prostoru uz poštovanje distance od minimalno metar, kao i u otvorenom javnom prostoru, ukoliko nije moguće održavati fizičku distancu od dva metra.



STOP
COVID-19



Prijem za odbojkašice i rukometašice koje su ušle u Premijer ligu

Djevojke iz ŽOK Igman Ilidža ostvarile su veliki uspjeh osvajanjem titule prvaka superlige FBiH i tako se plasirale u elitni rang premijer ligu BiH za odbojkašice među 10 najboljih ekipa u državi. Nakon izbivanja pandemije i tri kola prije završetka ligaškog takmičenja u superligi FBiH grupa Sjever odbojkašice trenera Damira Bahića zauzimale su prvo mjesto na tabeli bez ijednog poraza. Nakon odluke Odbojkaškog saveza da se završi prvenstvo Ilidžanke su morale odigrati dvije utakmice sa prvakom grupe Sjever, odbojkašicama ŽOK Bosna Kalesija. Poslije 12 godina Premijer liga BiH dolazi na Ilidžu gdje će se gledati utakmice sa najboljim ekipama u BiH.

Iz ŽOK Igman Ilidža ove godine stizale su samo dobre vijesti a u klubu se nadaju da će tako biti i naredne sezone te se zahvaljuju Općini Ilidža koja je njihov glavni partner u svemu što rade. Slična situacija je i sa rukometašicama Hrasnica.

Rukometašice Hrasnice plasirale u se u Premijer ligu Bosne i Hercegovine, a čelni ljudi ovog kluba u narednoj sezoni najavljuju pohod na sami vrh najelitnijeg klupskog takmičenja u našoj zemlji.

Uspjeh „vučica ispod Igmana“ kako ih od milja zovu navijači veći je ako se ima u vidu da ekipu uglavnom sačinjavaju rukometašice mlade i pune želje za pobjedom što je svo-



jevrnska nagrada za ogroman entuzijazam popularnog trenera Fuada Lokvančića Fuće.

Tim povodom načelnik Općine Ilidža prof. dr. Senaid Memić upriličio je 2. jula 2020. u općini prijem za ove ekipe.

Načelnik Memić je čestitao na uspjehu kazavši da je ponosan na svaki uspjeh Ilidžanki, te da uspjeha nema bez truda. Potom im je uručio novčanu nagradu u iznosu po 5.000 KM.

Otvoren “The River Coffee & Restaurant

Na Ilidži odnosno na adresi Hrasnička cesta broj 6. je 17.jula presijecanjem vrpce svečano otvoren The River Coffee & Restaurant, novo mjesto, koje je dodatno obogatilo gastronomsku ponudu grada Sarajeva. Od subote, 25. jula 2020. ovaj objekat ugostit će i svoje prve goste. Nekadašnja “Vrtlarska kuća” predstavljala je dobro poznato mjesto za stanovnike Ilidže, ali i grada Sarajeva, a zasijala je u novom ruhu.

“Radujemo se što smo svečano otvorili The River Coffee & Restaurant, a s nestrpljenjem očekujemo druženja s našim gostima, koje počinje od 25. jula. Kao društveno odgovorna firma, odlučili smo se za otvaranje ovog restorana u vrijeme pandemije COVID-19. Zaposlili smo određen broj osoba koja će raditi u restoranu i na taj način podržali domaću privredu u ovim zahtjevnim vremenima”, rekla je voditeljica restorana, Fatima Pobrklić.



No Limit radio za mlade

No Limit Omladinski Radio/Podcast je projekt koji Udruženja mladih Bez Ograničenja - NoLimit Ilidže provodi u sklopu svojih redovnih aktivnosti. Podržan je od strane Općine Ilidže.

Cilj je da obrađuju oblasti i teme koje su bliske mladim ljudima. Slobodno vrijeme, obrazovanja, putovanje, razmjene, stipendije, zaposlenja, prakse i slične teme će biti u fokusu njihovih emisija. Obradivati će i društvene pojave i probleme koje tište mlade ljude. Donosit će i uspješne i pozitivne priče mladih ljudi.

Putem modernih tehnologija interneta i socijalnih mreža omogućit će da uživate u dobroj muzici, zanimljivim temama i tako upoznate nas mlade ljude, a mladim ljudima ćemo dati priliku da svoje stavove ideje i razmišljanja iznesu u javni prostor i tako ih učinimo odgovornim i društveno korisnim individuama.

Opširnije o projektu možete pročitati na web stranici: kzm.ba





Prilagođena službena web stranica slijepim osobama

Općina Ilidža je prilagodila službenu web stranicu slijepim i slabovidnim osobama, kao i osobama s invaliditetom.

Projekt je realiziran u skladu s visokim tehnološkim standardima, a svi dokumenti i tekstualni sadržaji sa zvanične internet prezentacije su dostupni i u formi koja je prilagođena za korištenje i ovoj populaciji.

Šalter sala radi od 7,30 do 18 sati

Općinski načelnik prof. dr. Senaid Memić donio je Odluku o novom radnom vremenu šalter sale, koja je stupila na snagu 1. juna 2020.

Radno vrijeme u šalter sali Općine ostaje i dalje od 7,30 sati do 18,00 sati i odvija se u dvije smjene, na način da prva smjena traje od 7,30 do 16,00 sati, a druga smjena od 9,30 do 18,00 sati. Prijem stranaka u općinskim službama vršit će se u periodu od 7,30 do 14,00 sati.

Državni službenici i namještenici u općinskim službama imaju pravo na pauzu od 11,00 do 11,30. Radno vrijeme u Općini Ilidža je od 7,30 do 16,00 sati.



U aprilskom roku na Ilidži upisano 650 budućih prvačića

U aprilskom roku za upis učenika u prvi razred u deset osnovnih škola na području općine Ilidža upisano je 650 prvačića. U Prvoj osnovnoj školi upisano je 32 dječaka i 30 djevojčica, Druga osnovna škola za sad ima u prvom razredu 32 dječaka i 40 djevojčica, u Trećoj osnovnoj školi 29 dječaka i 25 djevojčica. U Četvrtoj osnovnoj školi u Hrasnici u prvi razred u aprilskom roku je upisano 19 dječaka i 21 djevojčica, u Petoj osnovnoj školi u Sokolović-Koloniji 30 dječaka i 31 djevojčica, Šesta osnovna škola za sada ima 53 đaka u prvom razredu i to 27 dječaka i 26 djevojčica. Sedma osnovna škola u prvi razred je upisala 45 dječaka i 24 djevojčice, dok je Osma osnovna škola u Butmiru upisala 15 dječaka i 20 djevojčica. Deveta osnovna škola upisala je za sad 35 školaraca u prvom razredu i to 15 dječaka i 20 djevojčica, a u Desetoj osnovnoj školi 25 dječaka i 24 djevojčice. Osnovna škola "Mehmed Handžić" u aprilskom upisnom roku u prvi razred upisala je 19 dječaka i 13 djevojčica, Katolički školski centar 32 dječaka i 35 djevojčica. PU "International Primary School Sarajevo" upisao je 15 đaka prvaka, 10 dječaka i 5 djevojčica. U drugom upisnom roku koji je planiran za august u svim osnovnim školama na području Općine Ilidža planirano je još njih 53.

Uručene zahvalnice načelniku Memiću i Seji Brajloviću

Brojne kompanije, poslovna i udruženja građana, kao i pojedinci na Ilidži masovno su se uključili u razne humanitarne akcije bilo putem donacija u novcu, robe ili ličnim volonterskim radom kako bi pružili podršku borbi protiv virusa korona. Svoju humanost u doba pandemije pokazali su mnogi. Općina Ilidža na čelu sa načelnikom prof.dr. Senaidom Memićem bila je prva karika u pomoći Domu zdravlja Ilidža. Jedan od brojnih privrednika koji su pružili pomoć Domu zdravlja je i sarajevski ugostitelj Sejo Brajlović. Tim povodom su 03. juna u Općini Ilidža načelniku prof.dr. Senaidu Memiću i Huseinu Seji Brajloviću uručene zahvalnice za nesebičnu pomoć i podršku u radu ove javne ustanove u doba pandemije.

Direktor JU Domovi zdravlja Kantona Sarajevo Muhamed Ahmić uručio je zahvalnicu. "U ime javne ustanove želim istaći da je ustanova dobijala razne pomoći od mnogih institucija i pojedinaca. Zahvaljujem se Općini Ilidža i načelniku prof.dr. Senaidu Memiću i Seji Brajloviću koji su nam prvi pritekli upomoć kada se tek pojavio COVID-19" izjavio direktor.

Glavni epidemiolog ilidžanskog Doma zdravlja Enes Šaćić zahvalio je u ime Doma zdravlja Ilidža "Mi kao prva linija, postigli smo izuzetne rezultate zahvaljujući našim prijateljima i donacijama. Ta pomoć koju smo dobili od Općine i Seje Brajlovića je bila neprocjenjiva" rekao je Šaćić.

Načelnik Memić je rekao kako je njegova podrška Domu zdravlja neupitna, jer je zajednički cilj bio izboriti se sa koronavirusom sa što manjim brojem oboljelih. Husein Sejo Brajlović izjavio je da je prepoznao potrebe i najbolji mogući momenat da pomogne, i da je uvijek na raspolaganju kada je pomoć u pitanju.

Aktivnosti u cilju realizacije projekta registracije nekretnina

Nakon više od dvije decenije, u skladu sa zadatim planom rada Općina Ilidža je započela aktivnosti na implementaciji projekta registracije nekretnina i usaglašavanja podataka o nekretninama između katastra i zemljišne knjige. Projekat se realizuje u saradnji i pod nadzorom Federalne uprave za geodetske i imovinsko pravne poslove FBiH. Rezultati projekta će značajno unaprijediti stanje u katastarskim evidencijama, te omogućiti rješavanje dugogodišnjih problema sa kojima se susreću vlasnici nekretnina u ovoj lokalnoj zajednici. Privrednim subjektima će biti olakšano poslovanje, a posebno u smislu privlačenja novih investicija, kao i izrade neophodne prostorno planske dokumentacije. Trenutno se provode aktivnosti na skeniranju arhivske građe i ažuriranju terenskih promjena, te podataka novog promjera za katastarske općine: Hrasnica, Butmir, Sokolović Kolonija, dijelove Ilidže, Nedžarića, Stojčevca i Vrela Bosne.



U toku asfaltiranje šest ulica

Na području općine Ilidža u toku je asfaltiranje šest ulica, a za ove namjene izdvojeno je 532.840,73 KM. U toku je rekonstrukcija ulice Gornja mahala u dužini 650 i širini tri metra. Investitor je Općina Ilidža u vrijednosti 96.000,00 KM. Radove izvođe radnici firme Braća Mujić d.o.o.

U ulici Hipodrom u toku je rekonstrukcija sa izgradnjom pješačke staze u dužini 330 metara i širini šest, te jedan i po metar pješačke staze. Općina Ilidža finansira ove radove koje izvođa Beton Fresh d.o.o u iznosu 252.500,73 KM.

Radovi izgradnje propusta u ulici Begluk sa pristupnim rampama su u toku. Dužina sa pristupnim rampama je oko 18,00 metara, a širina 17,68 metara. Investitor je Općina Ilidža. Izvođač radova je MGBH doo. Vrijednost radova je 54.385,73 KM.

U toku je i asfaltiranje ulice Kakrinjski put od br. 200 do br. 212.

Finansira se u omjeru Općina Ilidža 70, a 30 posto građani. Dužina je 97 metara, a širina tri.

Radovi su povjereni firmi DEMUS d.o.o., a vrijednost je 10.209,77 KM.

U toku je i asfaltiranje ul. Kobiljača od br. 64 do br. 138 u dužini 367, a širini tri metra. Investitor je Općina Ilidža i građani. Izvođač radova: DEMUS d.o.o. Vrijednost radova: 46.196,87 KM.

U dužini 639 metara radi se i asfaltiranje ul. Gornje Vlakovo od br. 390 do br. 320

Investitor je Općina Ilidža i građani, a vrijednost je 73.547,63 KM. Izvođač radova: DEMUS d.o.o.



Obezbijedeno 263 paketa demobilisanim borcima

Općina Ilidža organizovala je podjelu 263 paketa za korisnike demobilisane borce starije od 57 godina koji su ostvarili pravo kod Službe za boračka pitanja na novčanu egzistencijalnu naknadu (jer su na biro-u bez prihoda) i najranjivija su ciljna grupa za zarazu pandemije virusa korona. Svi koji su dobili rješenja su preuzeli prehrambene pakete u svojim MZ-a.

Kako se navodi iz Službe za boračka pitanja na spisku su oni koji su pravo na egzistencijalnu naknadu ostvarili do 1. aprila 2020. godine, te napominju da 10 korisnika koji su dobili pakete od Općine Ilidža putem Štaba CZ nemaju pravo i nije pravično da dobije dva paketa i isti se ne nalaze na spisku. Navedeni projekat organa i službi je podrška najugroženijim demobilisanim borcima u skladu sa Zakonom o pravima demobilisanih boraca FBiH.



Pomoć za povratnike u Bratuncu

Povratnike u Opštinu Bratunac obišla je vrijedna aktivistica Zlatija Dizdarević iz Udruženja Zlatna ruka i uručila im bajramske pakete, odjeću, obuću i hranu. U organizaciji ovog Udruženje je podijeljeno i 60 bajramskih paketića djeci slabijeg imovnog stanja i djeci bez roditelja sa područja općine Ilidža.





Obilježena 28. godišnjica Četvrtе viteške brigade

Polaganjem cvijeća na mjestu stradanja Emira Bogunića-Čarlija, sestara Samire i Mevlide Elčić i Džemaila Bulbula koji su poginuli 28. jula 1993. na Golom brdu na Igmanu i historijskim časom 28. jula 2020. je obilježena 28. godišnjica formiranja Četvrtе viteške motorizovane brigade koja je tokom rata čuvala Hrasnicu, Sokoloviće, slobodne teritorije Ilidže i područje Igmana, a samim time i „Kapiju Sarajeva“. Na tom mjestu okupili su se porodice šehida i poginulih boraca, prijatelji, saborci na čelu sa ratnim komandantom Četvrtе viteške motorizovane brigade, generalom Fikretom Prevljakom, omladina i drugi zvaničnici kako bi odali počast ovim herojima koji su se srcem i životima suprotstavili tehnički nadmoćnijem neprijatelju i dugo planiranoj strategiji uništenja ovih područja.

Zijad Hasečić, predsjednik UNRP „Zlatni ljiljan“ i „Zlatna policijska značka“ Općine Ilidža rekao je da je to mjesto na kojem se krvlju i životima branila slobodna ilidžanska teritorija i BiH, mjesto gdje su ginuli jedni od najboljih bosanskih sinova i kćeri, među kojima su Emir Bogunić-Čarli, sestre Elčić i Džemail Bulbul.

-Vrlo sam ponosan i sretan što sam ih poznao i ratovao s njima, što sam doživio neponovljiv događaj u historiji čovječanstva da branim svoju zemlju. Sretni su svi oni koji su živjeli s njima i borili se. Oni su bili svjesni koliko su Golo brdo i ovi prostori značajni za odbranu, izjavio je Hasečić.

O herojstvu Čarlija, sestara Elčić i Bulbula govorio je i ratni komandant 4. Viteške motorizovane brigade, general Fikret Prevljak, koji je naglasio kako njih četvero imaju ogromne zasluge koje ne smiju nikada biti zaboravljene. Istakao je i važnost kulture sjećanja na sve ono što se dešavalo tokom proteklog rata na ovim prostorima, prenošenja istine na mlađe generacije, te brigu za šehidske porodice.

- Našim porodicama ne treba puno, dovoljno je da ih se sjetimo, da ih upitamo za zdravlje, jer lijepa riječ otvara mnoga vrata, rekao je general Prevljak.

Dodao je da je ponosan na okupljanje saboraca koji ne dozvoljavaju da padnu u zaborav oni koji su krv prolili za slobodu naše zemlje.

- Sjećanja naša ovdje nisu samo sjećanja na njih četvero, već na sve šehide 4. Viteške motorizovane brigade i cijele BiH, dodao je Prevljak.

Emir Bogunić-Čarli bio je komandir voda Četvrtе viteške motorizovane brigade i jedan od najistaknutijih boraca. Najvišim ratnim priznanjem „Zlatni ljiljan“ odlikovan je 1993. godine, a posthumno je 1994. godine odlikovan „Ordenom za vojne zasluge sa zlatnim mačevima“ i promovisan u čin pukovnika Armije R BiH. Bosanske heroine sestre Mevlida i Samira koje su izbjegavši iz Dervente, preko Hrvatske došle da brane Sarajevo, poginule su na Golom brdu. Mevlida je posthumno odlikovana „Zlatnim ljiljanom“. Džemail Bulbul je istinski heroj koji je poginuo s puškom u rovu u akciji oslobađanja Golog brda.

Nakon Golog brda, brojne delegacije položile su cvijeće na mezarima Emira Bogunića-Čarlija i Ejuba Sarajkića-Eke u parku ispred Doma kulture u Hrasnici, kao i na Centralnom spomen-obilježju Ilidža. Na centralnom spomen obilježju ispred zgrade općine, načelnik prof. dr. Senaid Memić u svom govoru istakao je važnost Četvrtе viteške brigade, te čestitao godišnjicu svim preživjelim herojima.

- Heroji IV viteške čestitam vam za hrabrost, odlučnost, požrtvovanost, za izuzetno isticanje u borbi, veliko umijeće u izvršavanju borbenih zadataka te uspjehe protiv agresora: Nećemo zaboraviti da su za očuvanje suvereniteta i integriteta najbolji sinovi dali živote. A preživjeli rat danas se bore u ovo doba corone da prežive. Nisu dobra vremena, ali znajte da imate prijatelje kome se možete obratiti i moja vrata su uvijek otvorena, poručio je načelnik Memić.



Obilježen Dan „Odbrane Donjeg Kotorca“

Memorijalno-historijski susret „Odbrana Donjeg Kotorca“ i Dan ove mjesne zajednice obilježeni su 13. juna 2020. godine polaganjem cvijeća na spomen-obilježje poginulim borcima, učenjem Fatihe i prigodnim programom.

Cvijeće su položile brojne delegacije: Vlade Kantona Sarajevo, Općine Ilidža, boračkih udruženja i porodica šehida i poginulih boraca, političkih stranaka.

Prisutni su se prisjetili „Prve kotoračke bitke“ i presudnih događaja koji su se odvijali u Donjem Kotorcu.

U svom obraćanju načelnik Općine Ilidža prof.dr. Senaid Memić izjavio je kako je neophodno ponavljati šta se desilo 13. juna 1992. ali i podsjećati da se ne zaborave strahote i patnje kroz šta je prošao ovaj narod.

Još jednom su se svi prisutni podsjetili na dan kada se vodila sudbonosna bitka i ključna odbrana ovog teritorije, čijim bi zauzimanjem Sarajevo bilo potpuno odsječeno i blokirano, a postojanje BiH upitno.



Djeca stradala u parku u Hranici nisu zaboravljena

U parku u Hrasnici u organizaciji Udruženja logoraša Ilidža, 12. jula 2020. godine roditelji, rodbina, prijatelji, vršnjaci, delegacija Općine Ilidža, udruženja roditelja ubijene djece opkoljenog Sarajeva 1992-1995. godina, logoraša općine Ilidža, koordinacije boračkih udruženja Ilidže polaganjem cvijeća ispred spomen obilježja, učenjem Fatihe, minutom šutnje odali su počast ubijenoj djeci.

Prije 28 godinu 12. jula 1992. godine, tačno u 14,50 sati, granata ispaljena sa agresorskih položaja iz pravca Vojkovića usmrtila je četvoro nevinih mališana u parku u Hrasnici. Tog dana zauvijek su prestala da kucaju srca nevinih mališana Azmira Bradarca, Sanele Hadžiomerović, Aldnine i Admira Čolpe. Muhamed Omerović predsjedavajući Općinskog vijeća u svom govoru naglasio je da se ovakvi događaji ne smiju zaboraviti te da je pravda spora ali dostižna.

Obilježeno 28. godina „Akcije pokušaj deblokade Rakovice“

U skladu sa propisanim mjerama Kriznog štaba FBiH obilježavanje 28. godišnjice „Akcije-pokušaj deblokade Rakovice“ i Dana mjesne zajednice Rakovica u organizaciji Općine Ilidža i Udruženja boraca „Veterani rata 1992-1995 Rakovica“ 8. juna 2020. godine, proteklo je skromno i dostojanstveno. Brojne delegacije položile su cvijeće na spomen-obilježje, proučili Fatihu i odali počast poginulim borcima Rakovice. U prisustvu boraca, predstavnika Općine i boračkih udruženja, na skupu su evocirane uspomene na 6. juni 1992. godine kada su borci sa ovih prostora pokušali osloboditi Rakovicu.

Fikret Prevljak, general i komadant Četvrtе viteške motorizovane brigade rekao je kako borci koji su dali živote za odbranu Rakovice nikada se ne smiju zaboraviti.



Obilježeno 29. godina Patriotske lige Ilidža

Pripadnici Patriotske lige prvi su stali u odbranu, prihvatajući tako prvi udar nadolazeće agresije na međunarodno priznatu državu BiH, nakon čega je uslijedilo formiranje Teritorijalne odbrane i Armije Republike Bosne i Hercegovine.

Prigodnim programom upriličenim ispred centralnog spomen obilježja na Ilidži obilježena je 29. godišnjica održavanja sastanka na kojem je donesena Odluka da se krene u formiranje Patriotske lige Ilidže i organizovanje otpora snagama koje nisu željele dobro našoj državi.

Patriotska liga je stvorena s ciljem da se u nju učlane sve patriotski, probosanski i građanski orijentisane osobe.

Brojne delegacije 12. juna 2020. okupile su se ispred centralnog spomen-obilježja na Ilidži, kako bi položile cvijeće i odali počast šehidima i poginulim borcima, koji su dali živote za odbranu Ilidže, a i BiH.

Načelnik Općine Ilidža prof.dr. Senaid Memić u svom obraćanju istakao je važnost patriotske lige koja je djelovala u tajnim uslovima, ali s jasnim ciljem, pružiti otpor onima koji su željeli uništiti BiH.

“ I danas se osjeća isti patriotski naboj koji se mogao osjetiti kada su neprijatelji prijetili nestankom BiH i bošnjačkog naroda. Mi okupljeni ovdje šaljemo poruku da nikada nećemo dozvoliti da ideja multinacionalne i cjelovite BiH bude ugrožena. Kad smo mogli 1992. se oduprijeti takvom neprijatelju, možemo i danas nastaviti njegovati trajnost patriotske svijesti, a ujedno i ideju jedinstva “ poručio je načelnik Memić.

Cvijeće su položile delegacije Vlade Kantona Sarajevo, Općinskog vijeća Ilidža, Četvrtе viteške brigade, Patriotske lige Ilidže sa kantonalnim savezom PL, te predstavnici općinskih odbora stranaka SDA i Narod i Pravda.





Najljepšu baštu ima Adnan Vejzović, a balkon Alija Kovač

Općina Ilidža desetu godinu zaredom, organizovala je izbor najljepšeg dvorišta i balkona sa cvijetnim aranžmanom, a s ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine i poboljšanja turističke ponude. Na raspisani javni poziv prijavilo se 35 aplikacija koje je komisija za izbor obišla i odabrala najbolje. Za najljepše dvorište prva nagrada pripala je Vejzović Adnanu iz Osjeka, drugo mjesto osvojila je Tabak Snježana iz Sokolović- Kolonije, a treće Hadžić Mujezina iz Blažuja. Najljepši balkon sa cvijetnim aranžmanom ima Kovač Alija iz Rakovice, dok je drugo mjesto pripalo Baručija Elmi iz Sokolović- Kolonije, a treće Turkušić Irmu iz Osjeka. Za sve njih Općina Ilidža obezbjedila je novčane nagrade, i to u kategoriji najljepšeg dvorišta za prvo mjesto 800, drugo 700 i treće 600 KM. Za najljepši balkon prva nagrada iznosi 600, druga 500 i treća 400 KM.

